

11 November 2010

Jaargang 3 – Uitgawe 39

## In hierdie uitgawe

- Voorblad
- Beroepe en standplase
- Predikante en gemeentes
- Ander nuus
- Kommentaar
- Advertensies
- Agterblad



Teken in op e-Hervormer en ontvang elke uitgawe gratis per e-pos!

- Besoek die webwerf by [www.hervormer.co.za](http://www.hervormer.co.za) en klik op die "Teken in"-opsie; of
- stuur 'n e-pos aan [karen@nhk.co.za](mailto:karen@nhk.co.za)

Nuus, berigte en kort kommentaar (uiters 100 woorde) aan [produksie@nhk.co.za](mailto:produksie@nhk.co.za)

## VOORBLAD

### Waardigheid en geloofwaardigheid

Die afgelope week het veral één e-posboodskap teen die snelheid van lig versprei. 'n Sekere mnr Uys de Vos het die eenmanvertoning van Casper de Vries, GAAN GROOT, in Swakopmund bygewoon. Mnr De Vos het na afloop van die vertoning 'n hoflike dog profetiese woord tot mnr De Vries gerig, waarop laasgenoemde op eg De Vries-maniër gereageer het. Lees gerus meer daarvoor by <http://www.beeld.com/Suid-Afrika/Nuus/Christene-moet-leer-dink-vies-De-Vries-20101103>.

Wat duidelik uitstaan in die e-posgesprek tussen genoemde here, is die eeue oue saak waarvoor die apostel vir Timoteus adviseer: *...in die laaste dae sal daar swaar tye kom. Die mense sal selfsugtig wees, geldgierig, grootpraterig en verwaand, beledigend teenoor hulle medemense... ongodsdienstig... kwaadpraters, bandeloos... Hulle sal eerder liefde vir genot hê as liefde vir God (2 Tim 3: 1-4). Ek beveel jou voor God en voor Jesus Christus... verkondig die woord; hou daarmee vol, tydig en ontydig; weêrlê, bestraf, bemoedig deur met alle geduld onderrig te gee, want daar sal 'n tyd kom wanneer die mense die gesonde leer nie meer sal verdra nie. Hulle sal hulle eie begeertes volg en vir hulle leermeesters bymekaarmaak wat net sal sê wat hulle graag wil hoor... (2 Tim 4: 1-3). Almal wat in Christus Jesus toegewy aan God wil lewe, sal ook vervolgd word. Maar die goddelose mense en bedrieërs sal voortgaan van kwaad tot erger... (2 Tim 3: 12-13).*

Gelowiges in Jesus Christus sal altyd in dié stryd betrokke wees. Die belangrike saak is egter dat ons die onderrig van die apostel ter harte sal neem. *Dié stryd word gestry deur volhardend na die wil van God te soek, verkeerdhede reg te stel en dwalinge te bestry.* Die bron tot ons beskikking is en bly die Skrif, en die begeleier is die Heilige Gees. Solank as wat ons stilswyend toelaat en self deelneem aan dit wat nie die eer van God en die opbou van ons medemens voor oë het nie, verloor ons nie alleen ons waardigheid as kinders van God nie, maar ook ons geloofwaardigheid in die wêreld.

Indien ons iets positiefs uit hierdie gebeure wil uitlig, sal dit myns insiens op twee vlakke lê. Eerstens toon die reaksie van medegelowiges dat kinders van God, ten spyte van die tydgees waarin ons leef, steeds onbeskaamd opstaan en getuig teenoor individue wat op hovaardige wyse dit wat heilig is, afkraak en daarmee die spot dryf. Alle dank daarvoor kom die Gees van God toe wat belowe het om gelowiges in Jesus Christus toe te rus vir hul getuienistaak in die wêreld. In die tweede plek meen ek dat hierdie selfonthulling en tirade van mnr De Vries 'n ernstige kontrolevraag rig tot elke belydende kind van God: Is ons te alle tye waardige ligdraers en getuies van Christus Jesus? Onthou: die wêreld waarin ons leef, is nie blind nie en ook nie oningelig nie. Dit wat aan ons toevertrou is (2 Tim 1: 7, 8a, 9), stel ons daagliks voor die keuse: Ons is óf vir God óf teen God. Daar is nie 'n tussenposisie nie. Wie nie daarmee rekening hou nie, verloor alle waardigheid en geloofwaardigheid.

## Skakels

Webblad van die Hervormde Kerk [www.nhk.co.za](http://www.nhk.co.za)  
Die Hervormer [www.hervormer.co.za](http://www.hervormer.co.za)  
e-Hervormer [www.hervormer.co.za/e\\_Hervormer.html](http://www.hervormer.co.za/e_Hervormer.html)

Indien u nie weer die e-Hervormer wil ontvang nie, klik op [www.hervormer.co.za/cancel.html](http://www.hervormer.co.za/cancel.html)

**Ds Andries M Nel  
Witpoortjie**



## BEROEPE EN STANDPLASE

Kontak die webbladredakteur, prof Ernest van Eck, by [ernest.vaneck@up.ac.za](mailto:ernest.vaneck@up.ac.za) om vakante standplase op die Kerk se amptelike webblad by [www.nhk.co.za](http://www.nhk.co.za) te plaas. Onthou asseblief dat 'n standplaas eers vakant verklaar moet wees voordat dit geadverteer mag word. Kontak dr Fanie Pretorius by 012 322 8885 x256 in dié verband.

### Beroep ontvang

- **Ds Colin Hertzog** van Middelburg-Noord na Vryburg

### Beroep bedank

- **Ds Dirk van Rooyen** van Carletonville na Sasolburg-Suid



Ds Colin Hertzog

Ds Dirk van Rooyen

### Vakante standplaas

- **Gemeente Windhoek** beskik oor 'n vakante **volsorgstandplaas**. Windhoek is 'n stadsgemeente, alhoewel die karakter eerder dié van 'n groot plattelandse dorp is. Die gemeente is saamgestel uit 554 siele, waarvan 503 in Windhoek en 51 in Okahandja woon. Okahandja is 70 km noord van Windhoek. Die ouderdomsverspreiding is: 39% jonger as 30 jaar; 31% 30 tot 50 jaar; 19% 50 tot 65 jaar; 11% ouer as 65.

Daar is elke Sondag 'n oggenddiens in Windhoek en ± 3 uit elke 4 Sondae per maand 'n erediens in Okahandja, vakansies uitgesluit. Met die meeste lidmate jonger as 30 jaar, wil die gemeente fokus op die bediening van kinders en jongmense. Omdat Windhoek die hoofstad is, werk heelwat jongmense van die platteland daar.

Aansoeke moet die gemeente **voor 19 November 2010** bereik. Predikante en proponente kan 'n CV aan die skriba stuur by [nedherv@mweb.com.na](mailto:nedherv@mweb.com.na). Die Kerkraad behou die reg om 'n predikant te beroep wat nie aansoek gedoen het nie.

Die gemeente besit 'n pastorie, maar alternatiewe behuising sal oorweeg word. Windhoek beskik oor 'n wye keuse van goeie skole met Afrikaans óf Engels óf beide as voertaal. Die beroepe predikant sal moet aansoek doen om 'n werkspermit en dit sou 'n aanbeveling wees (maar is nie 'n voorvereiste nie) as so 'n persoon Namibiese burgerskap deur afkoms of huwelik kan bekom. Enige verdere navrae kan aan bogenoemde e-posadres gerig word.

## PREDIKANTE EN GEMEENTES

- **Ds Frans Ras** het op Sondag 7 November van Gemeente Eendracht afskeid geneem. Hy het die beroep na die deelsorgstandplaas van Pietermaritzburg aanvaar.
- **Ds Hennie la Grange** wat in Londen werk in diens van die Christelike Seemans-organisasie (CSO), is tans op besoek aan die Republiek. Hy het verskillende take wat hy moet behartig. Hy het tyd ingeruim om 'n welwillendheidsbesoek by die kantoor van die Kommissie van die Algemene Kerkvergadering (AKV) af te lê.
- **Dr Gerrie Bloem** is op Woensdag 10 November vanuit die kerkgebou van Losberg begrawe. Dr Malan Storm, predikant van Meyerspark waar dr en mev Bloem vir baie jare lidmate was, het die diens gelei en ook namens die Kommissie van die AKV en die Kerk hulde aan dr Bloem gebring. **Gemeente Vredefort**, waar dr



Ds Frans Ras

Ds Hennie la Grange



Dr Gerrie Bloem



Bloem geruime tyd gedien het as pastorale hulp, se aansoek om meer permanent van dr Bloem gebruik te maak, sou op 11 November voor die Kommissie gedien het. Die kerkraad het reeds hul huisvesting beplan. Meelewing word met mev Marie Bloem betuig, en daar word ook gedink aan die gemeente in rou.

- **Die volgende predikante verjaar in die komende week**, en word hartlik geluk gewens.
  - Saterdag 13 November: Ds Innes Benadé (Outeniqua)
  - Sondag 14 November: Ds Nicolaas Steenekamp (Middelburg)
  - Maandag 15 November: Di Hannes Janse van Rensburg (Zuurfontein), Francois du C Labuschagne (emeritus) en Pieter Pretorius (Zesfontein)
  - Dinsdag 16 November: Ds Casper du Plessis (Hennenman/Odendaalsrus) en dr Wian Kloppers (sinodaal)
  - Woensdag 17 November: Dr Wilhelm Coetzer (siekte-emeritaat)
  - Donderdag 18 November: Ds Chris Viljoen (CSO)
- Aansoeke van verskeie gemeentes om die **opheffing van deelydse standplase** sal voor die Kommissie van die AKV dien by hul vergadering op 11 en 12 November. Die aansoeke van 'n aantal gemeentes om van **emeriti as pastorale hulp** gebruik te maak, sal ook hanteer word.
- Die Kommissie van die AKV sal tydens hul vergadering twee **aansoeke van predikante uit die NG Kerk** om toelating tot die evangeliebediening in die Hervormde Kerk behandel. Aansoeke van voormalige predikante van die Hervormde Kerk om **hertoelating** tot die evangeliebediening sal ook aandag kry.
- Die **Almanak/Bybelse Dagboek van 2011** word in die komende week by SENTIK afgelewer. Gemeentes word daaraan herinner dat indien hulle nie nuwe bestellings plaas nie, die  **vorige jaar se hoeveelhede** aan hulle gestuur sal word. Bestel asseblief onverwyld by mev Susann van Zyl, by 012 322 8885 x291, faks 086 633 4054 of [sentik@nhk.co.za](mailto:sentik@nhk.co.za). Die prys is dieselfde as vir die 2010-uitgawe, naamlik R100 per eksemplaar. (Lees die agterbladberig oor die verspreiding van dié publikasie.)
- **Individue** wat die **Almanak/Bybelse Dagboek** bestel, word weer eens daarop gewys dat tjeks uitgemaak moet word aan die **Raad van Finansies**, en nie aan bepaalde persone of aan SENTIK nie. Kontak mev Susann van Zyl (besonderhede hierbo) om te bestel. Die bankbesonderhede vir direkte inbetalings is Raad van Finansies, ABSA, tjekrekening nommer 020 000 287, takkode 632 005, verwysing ALMANAK.
- **Eendrachtkring se afsluiting**: Die lede van die **Eendrachtkring** word herinner aan die Kersete op **Donderdag 18 November** in die kerkkompleks van **Gemeente Montana**. Skakel Marié Antonites (012 332 1053) of Hendrien Swart (012 654 9766) teen 12 November vir bespreking en inligting.
- **Gemeente Erasmia** het die projek verlede jaar begin waar skoenboksies met artikels uit 6 verskillende kategorieë gepak word per ouderdom en geslag. Hulle word bygestaan deur die **ring van Pretoria-Wes**, en voorsien aan hul gemeenskap se kinders eerste; die res gaan na Hans Plakker by Doulos-bediening. Verlede jaar kon hulle, nadat aan die gemeentes in Pretoria-Wes voorsien is, amper 300 pakkies aan Doulos gee. Indien u belangstel om deel van die projek te wees en 'n lys van benodighede wil bekom, kontak Adine by 082 873 6706 of stuur 'n e-pos aan [adine@abacnet.co.za](mailto:adine@abacnet.co.za).
- **Gemeente Springs-Oos** beskik oor 'n **vakature vir 'n tweede orrelis**. Die pos is onmiddellik beskikbaar. 'n Volledige pligstaat en besonderhede oor die



vergoeding sal tydens die onderhoud met kandidate bespreek word. Vergoeding is volgens skaal. Gekwalifiseerde orreliste kan hul CV en 'n gewaarmerkte afskrif van hul kwalifikasie as orrelis per e-pos aan die skriba, oudl Retha Laubscher, by [rethalaubscher@gmail.com](mailto:rethalaubscher@gmail.com) stuur.

- **Gemeente Rietvallei** beskik oor 'n **vakature vir 'n orrelis**. Persone met die nodige kundigheid en ervaring om die gemeente tydens Sondag-oggende se eredienste, informele jeugbyeenkomste op Sondag-aande en Christelike feesdae te begelei, kan navrae rig of 'n CV stuur na die gemeentekantoor: faks 012 345 3143 of e-pos [nhrietv@telkomsa.net](mailto:nhrietv@telkomsa.net). Diensvoorwaardes is soos deur die Hervormde Kerk voorgeskryf. Diensaanvaarding teen Januarie 2011 of so gou moontlik.
- **Gemeente Laer Suidkus** benodig 'n predikant om op **25 Desember** 'n erediens (Kersdiens) te hou op Port Edward om 08:00, op **2 Januarie 2011** om 08:00 te Port Edward en om 09:30 te Port Shepstone (gewone eredienste). Indien daar predikante is wat dan aan die Suidkus van KwaZulu-Natal vakansie hou en gewillig is om enige van die genoemde eredienste te lei, skakel asseblief met die skriba, Frik Esterhuyzen, by 039 695 9430 of 082 556 9793.
- **Kennisgewing aan alle NHSV-takke:** Die datum vir die **46ste Nasionale Kongres** is 6, 7 en 8 Oktober 2011. Die kongres vind plaas by Gemeente Wonderboom in Pretoria.
- In die voetspore van die eerste Christene: **Toer na Egipte en Turkye van 20 April tot 4 Mei 2011** onder leiding van **ds Martin Slabbert**. Besoek die webwerf [www.indievoetspore.co.za](http://www.indievoetspore.co.za), of kontak ds Slabbert by 082 655 4787.
- **Gemeente Philadelphia** het **vakante studentebewoening** op hul kerkterrein. Dit is sowat 100 m vanaf UP se Lunnonweg-ingang. Dit is 'n kommune van 10 inwoners wat 'n kombuis en twee badkamers deel. R2 450 per maand vir die groot kamers en R1 950 per maand vir die kleiner kamers. Verkieslik huurders wat studeer aan UP en by die gemeente sal inskakel as lidmate; die kamers moet voor einde November verhuur word. Kontak Esme Bolton by 012 362 7237 op weksdae tussen 08:30 en 13:30, of Rue Hopley by 083 669 3060 (enige tyd).
- **Eerstejaarskampe 2011**
  - **Pretoria: Philadelphia: Saterdag 22 tot Donderdag 27 Januarie**  
Kwaggasrus, ongeveer 30 km buitekant Brits  
R800 per persoon, sluit twee T-hemde in  
Kontak Pierre Brits (kampvoorsitter) by 079 942 2662,  
ds Martin Slabbert by 082 655 4787 of dr Sanrie de Beer by 083 226 1866  
Stuur 'n e-pos na [philadelphia@nhk.co.za](mailto:philadelphia@nhk.co.za) vir meer inligting
  - **Bloemfontein: 9 tot 13 Januarie**  
Kamp saam met Kougom  
R650 per persoon, inskrywings sluit op 8 Januarie  
Kontak ds Willem Dykema by 082 560 4772  
of Giselle Fourie (kampvoorsitter) by 082 649 6527
  - **Stellenbosch: Saterdag 15 (12:00) tot Dinsdag 18 Januarie (17:00)**  
R400 per persoon, alles ingesluit  
Kontak ds Chris le Roux by 082 905 0818 of [cleroux@nhk.co.za](mailto:cleroux@nhk.co.za)
  - **Potchefstroom-Studente: Dinsdag 11 tot Vrydag 14 Januarie**  
R700 per persoon, verblyf, etes en 'n T-hemp ingesluit  
Kontak ds Rudy Denton by 082 459 9710 of [rudy@nhk.co.za](mailto:rudy@nhk.co.za)  
of Terzie Denton by 082 475 4618 of Jana Smit by 079 880 7466



## Konserte en dames- en mannebyeenkomste

- **Saterdag 27 November 19:00: Gemeente Pretoria-Oos**  
Delyweg 100, Waterkloof  
Saam met Musica Instrumente en Allen Kerkorrels  
Rocco de Villiers agter klavier en Pieter van den Berg agter orrel  
Ook met F# Koor en Alta van Huyssteen  
Ten bate van 'n kindershuis  
Kaartjies R100 per persoon, beskikbaar by die gemeente (012 460 8441)  
of by Pieter van den Berg (072 041 3954)  
of by Musica Instrumente, Atterbury Value Mart

## Sportbyeenkomste en -kompetisies

- **Gemeente Vaalpark: Gholfdag Vrydag 12 November**  
10de jaarlikse gholfdag  
Meyerton-gholfbaan  
Afslaan vanaf 11:00  
R1 200 per 4-bal, R300 per persoon  
Borge welkom  
Kontak Danie le Roux by 082 816 8453 of Johann Hugo by 082 920 9455
- **Gemeente Bronkhorstspuit: Karp-hengelkompetisie**  
**Saterdag 13 November**  
04:00 tot 16:00  
By Vlooiopdam (privaatdam – bring eie eet- en drinkgoed saam)  
R90 per hengelaar met 2 stokke  
1ste prys slagos; 2de prys R1 000; 3de prys R500  
Slegs oewerhengel – aasbootjies word toegelaat  
Navrae aan Achom Prinsloo by 072 345 2025
- **Gemeente Randburg: Gholfdag Dinsdag 23 November**  
CMR-gholfbaan, Maraisburgweg, Roodepoort  
Ten bate van Cluny Farm, Midrand  
Tehuis vir 58 verstandelik gestremde persone wat hulself onderhou  
met plant van groente en verkoop van gebak en melk  
R1 600 per vierbal, borg van putjies welkom  
Kontak Christa Clifton by 082 566 1907 of [christac@atkv.org.za](mailto:christac@atkv.org.za)
- **Gemeente Bronkhorstspuit: Gholfdag Vrydag 26 November**  
Bronkhorstspuit-gholfklub  
R800 per 4-bal of R200 per persoon (sluit R20 halfweghuis-ete in)  
Borge welkom  
Afslaan 11:00  
Kontak Attie Botha by 083 627 4263
- **Gemeente Oudtshoorn: Gholfdag Saterdag 4 Desember**  
Oudtshoorn-gholfbaan  
R1 200 per 4-bal, R300 per persoon, borge welkom  
Kontak ds Monja-Lize van Belkum by 082 786 5752

## Basaars en markte

- **Saterdag 27 November: NHSV Hendrina Barmhartigheidsboeredagbasaar**  
Hv Van Niekerk- en Beukesstraat, Hendrina  
Uitstallers welkom teen R100 per tafel – wins is joune  
Volop vleis en alles waaraan jy kan smul in oorfloed  
Alle winste vir barmhartigheid



Kontak Cia van der Westhuizen by 083 452 8394

- **Woensdag 1 tot Saterdag 4 Desember: Gemeente Bergsig Kersmark**  
Huur 'n stalletjie teen R50 plus 10% van die verkope per stalletjie  
Skryf in vir die potjiekoskompetisie teen R20 elk  
Kontak Marie by 082 402 4170
- **Saterdag 4 Desember: Doulos Gemeenskapsprojek**  
Kersfunksie by Silwer Valke Rugbyklub  
Hv Pretoria- en Roestoffstraat, Silverton  
Hulp benodig vir maak van potjiekos vir 2 000 mense  
Borge ook welkom  
Kontak Hans Janse van Rensburg by 083 269 7082  
of Heleen Huyser by 082 443 8874 of [Heleen.Huyser@postoffice.co.za](mailto:Heleen.Huyser@postoffice.co.za)
- **Donderdag 16 tot Sondag 19 Desember: Gemeente Wesmoot Kersmark**  
Makro Wonderboom se parkeerterrein  
Staanplekke is 3 x 4 m, koste per dag R150, R500 vir vier dae  
Kontak ds Fanie Beukes by 073 167 1183
- **Saterdag 29 Januarie 2011: Gemeente Nelspruit Maroelafees**  
Vanaf 08:00 by Nelspruit Rugbyklub  
Toegang (sluit glas maroelasap in) R20 per volwassene/hoërskoolkind  
R10 per laerskoolkind, gratis vir voorskoolse kleuters  
Kontak gemeentelike kerkkantoor by 013 741 1455

## ANDER NUUS

- Die Hervormde Kerk het 'n **vakature vir 'n ouditeursklerk** vir die ouditering en opskryf van gemeentes se boeke. Die persoon moet 'n stel finansiële boeke tot proefbalans-stadium opstel en bewysstukke kontroleer. Hy/sy moet pligsgetrou wees, en beskik oor goeie kommunikasie- en organisasievaardighede en die vermoë om as lid van 'n span te funksioneer. Die kandidaat moet ook rekenaarvaardig wees in MS Office; ondervinding in Pastel, Quick Books en/of Turbocash sal 'n aanbeveling wees. Onderhandelbare salaris met normale diensvoorwaardes. **Sluitingsdatum vir aansoeke is 26 November 2010.** Aansoeke met 'n kort CV moet gerig word aan mev Susan Reyneke, Posbus 2368, Pretoria 0001, tel 012 322 8885 x252, faks 086 580 0960, e-pos [susan@nhk.co.za](mailto:susan@nhk.co.za).
- Die **studente van die Afrika Instituut vir Missiologie (AIM)** soek werk op Saterdag (**tuinwerk of huiswerk**). Hulle woon op die hoek van Bosman- en Vermeulenstraat in die stad, by The Foundation. Onderhandel direk met hulle oor vergoeding en vervoer. Kontak Paul Motshabi by 083 720 9823 – hy is 'n student en sal met al die ander studente skakel indien meer as een student benodig word.
- **Transoranje Skool vir Doves: 26 November tot 5 Desember Kersmark**  
Pretoria-skougronde, Saal L, ingang Kerkstraat
- Die **volgende vergaderings** vind in die komende week plaas. Betrokkes moet hulself asseblief vergewis van die korrekte vergadertye en lokale.
  - Donderdag 11 November: Kommissie van die AKV
  - Vrydag 12 November: Kommissie van die AKV
  - Dinsdag 16 November: Kuratorium
  - Donderdag 18 November: Raad van Finansies
  - Vrydag 19 November: Predikantepensioenfonds;  
Personeelpensioenfonds;  
Finkom van Die Ondersteuningsraad

## KOMMENTAAR

Die redaksie van *Die Hervormer* en die *e-Hervormer* het ernstig besin oor die plasing van kommentaar in die nuusbrief. Lesers is welkom om nou weer kort kommentaar (uiters 100 woorde) te stuur aan [produksie@nhk.co.za](mailto:produksie@nhk.co.za). Langer bydraes sal nie geplaas word nie, en moet eerder na die gespreksforum van die Kerk se webblad by [www.nhk.co.za](http://www.nhk.co.za) gestuur word. Die finale besluit oor plasing in die *e-Hervormer* berus by die redakteur.

## ADVERTENSIES

### VEILIGE, NETJIESE STUDENTEVEERBLIF NABY STELLENBOSCH

*Die Pastorie* is 18 km van die Universiteit van Stellenbosch  
Geleë in die stil omgewing van Heldervue  
Verskeie eenmens-woonstelle met eie badkamer en kombuis  
Pragtige see- en berguitsig  
Braaiarea en veilige parkering  
Ons dra graag jou kind se belange op die hart  
Vakansieverblyf vir Desember ook beskikbaar  
Skakel ds Jan Claassen by 084 400 5137 of 021 855 4847

Advertensies waarvan 'n private individu of instansie die begunstigde is, of waarin 'n gemeente uitgebreide inligting oor 'n projek wil bekendstel, kan in die **e-Hervormer** geplaas word, teen **R114 per plasing**. Die teks moet saam met die bewys van betaling gestuur word aan mev Tessa Oppermann, per e-pos na [produksie@nhk.co.za](mailto:produksie@nhk.co.za), of per faks na 086 633 4059 of 012 322 7906. GEEN advertensie sal geplaas word sonder dié bewys nie. Die verskuldigde bedrag moet uitgemaak word aan: Raad van Finansies; ABSA; tjekrekening nommer 020 000 287; takkode 632 005; **verwysing**: u naam + **e-Hervormer Ads**. Kontak mev Oppermann vir meer inligting.

## AGTERBLAD

### *Almanak en Bybelse Dagboek vir 2011*

In die komende week word die nuwe *Almanak/Bybelse Dagboek* by SENTIK afgelewer.

Soos verlede jaar, vra SENTIK hulp en ondersteuning van gemeentes en ringe met die verspreiding van die publikasie. Met u hulp kan ons die boeke vinnig en koste-effektief versprei; daarsonder vat dit veel langer en kos dit baie geld. Gemeentes en ringe in en om Pretoria moet asseblief self reëlings tref om hul besending by die Sinodale Kerkkantoor te kom afhaal. Predikante of ander verteenwoordigers van gemeentes buite Pretoria moet waar enigsins moontlik ook hul gemeente en/of ring se eksemplare kom afhaal, en vir die verdere verspreiding daarvan reëlings tref.

Dit is belangrik om met SENTIK reëlings te tref voordat 'n verteenwoordiger die gemeente of ring se bestelling kom afhaal, sodat die pakke betyds opgemaak en reggesit kan word. Al die gemeentes in 'n bepaalde ring moet presies weet waar hul boeke uiteindelik afgehaal moet word.

Kontak dr Wouter van Wyk by 012 322 8885 x261 of [wouter@nhk.co.za](mailto:wouter@nhk.co.za) om reëlings te tref vir verspreiding.